

**GEORGE MUNISIPALITEIT**  
**VERORDENING INSAKE DIE SKUT VAN DIERE**

Kragtens die bepalings van artikel 156 van die Grondwet, 1996, saamgelees met artikel 11(3)(m) van die Wet op Plaaslike Regering: Munisipale Stelselwet, 2000 (Wet 32 van 2000), bepaal die George Munisipaliteit as volg:

**INHOUDSOPGAWE**

1. Woordomsrywings
2. Toepassing
3. Vestiging van skut
4. Aanstelling van skutmeester
5. Skut van diere wat rondloop of oortree
6. Diere wat te wild, onhanteerbaar, siek of boosaardig is om te skut
7. Vrylating van diere voordat dit geskut word
8. Versorging van diere wat oortree
9. Skut waarheen diere geneem moet word
10. Inligting verskaf te word aan skutmeester
11. Aanvaarding van diere by skut
12. Skutregister
13. Kennisgewing aan eienaars van diere
14. Versorging van geskutte diere
15. Afsondering van besmette diere
16. Geskutte diere nie geskik vir werk
17. Vrektes onder of besering van geskutte diere
18. Afskrifte van verordeninge
19. Gelde en kostes betaalbaar
20. Vrylating van geskutte diere
21. Verkoop van geskutte diere
22. Skutmeester verbied om geskutte diere te koop
23. Diere wat nie verkoop kan word nie
24. Opbrengs
25. Optrede vir verhaling van skadevergoeding
26. Prosedure tydens hofaansoeke
27. Vrywaring
28. Oortredings en boetes
29. Bylae 1 en 2 vorm deel van hierdie verordening
30. Herroeping van verordening
31. Kort titel en inwerkingtree

**1. Woordomsrywings**

Tensy teenstrydig met die sinsverband van hierdie verordening, beteken-

“**dier**” 'n perd, bees, donkie, skaap, bok, vark, volstruis, hond, kat of die baster van enige sodanige dier en het “**diere**” 'n ooreenstemmende betekenis;

“**Hof**” 'n Landdroshof soos na verwys in artikel 166(d) van die Grondwet, 1996, met jurisdiksie in die gebied waarbinne die skut geleë is;

“**Koerant**” die amptelike Provinsiale Koerant van die Provinsie: Wes-Kaap.

“**munisipaliteit**” die George Munisipaliteit wat ingevolge artikel 155(6) van die Grondwet en artikel 11 en 12 van die Plaaslike Regering: Munisipale Strukturewet, 1998 (Wet 117 van 1998) gestig is;

“**eienaar**” 'n eienaar wat bekend is, of wie se identiteit redelik vinnig vasgestel kan word, en in verhouding tot enige -

- (a) dier, sluit dit die agent van die eienaar in of enige ander persoon wat wetlike toesig of besit het van sodanige dier; of
- (b) grond, sluit dit die eienaar, huurder of wettige bewoner van sodanige grond of sy of haar agent in;

“**skut**” 'n skut opgerig soos beoog onder artikel 3;

“**skutmeester**” die persoon wat van tyd tot tyd aangestel word soos beoog onder artikel 4 en

sluit dit enige persoon in wat namens die aangestelde skutmeester waarneem;  
**“openbare plek”** enige plek waartoe die publiek toegang het, insluitend en sonder beperking van die voorafgaande, enige -

- (a) plein;
- (b) park;
- (c) ontspanningsgebied;
- (d) sportgronde;
- (e) oopruimte;
- (f) strand;
- (g) inkopiesentrum op munisipale grond;
- (h) ongebruikte of onbeboude munisipale grond; of
- (i) begraafplaas;

**“openbare pad”** soos beoog onder artikel 1 van die Padverkeerswet, 1996 (Wet 93 van 1996); en

**“diensleweringsooreenkoms”** 'n diensleweringsooreenkoms soos omskryf in artikel 1 van die Plaaslike Regering: Munisipale Stelselswet, 2000 (Wet 32 van 2000).

## 2. Toepassing

Hierdie verordening is van toepassing binne die hele regsgebied van die Munisipaliteit met dien verstande dat niks sal verhoed dat enige dier wat ingevolge hierdie verordening in aanhouding is, geskut word in 'n skut of soortgelyke plek, wat deur 'n ander munisipaliteit of ander wettige owerheid opgerig is.

## 3. Vestiging van skut

(a) Die Munisipaliteit mag 'n skut op enige gerieflike plek binne sy regsgebied vestig, met dien verstande dat dit 'n diensleweringsooreenkoms met enige instelling of persoon in artikel 76(b) van die Plaaslike Regering: Munisipale Stelselswet, 2000 (Wet 32 van 2000) genoem, mag sluit, ten einde vir die vestiging en bestuur van 'n skut, wat sy hele regsgebied bedien, voorsiening te maak.

(b) Die Munisipaliteit moet in ten minste twee geregistreeerde koerante wat binne sy regsgebied sirkuleer, kennis gee van sy voorneme om 'n skut te vestig.

## 4. Aanstelling van skutmeester

Die Munisipaliteit moet kragtens sy menslike hulpbronne beleid, 'n geskikte gekwalifiseerde persoon as skutmeester aanstel, tensy die skut gevestig en bestuur word ingevolge 'n diensleweringsooreenkoms, beoog onder artikel (3)(a).

## 5. Diere wat rondloop of oortree mag geskut word

(1) Die eienaar van grond waarop 'n dier oortree mag op die dier beslag lê met dien verstande dat sodanige dier nie na 'n skut afgevoer mag word, alvorens skriftelike kennis van minstens 48 uur voor afvoering na die skut, aan sodanige eienaar daarvan gegee is nie.

(2) Enige dier wat sonder toesig op 'n openbare pad of openbare ruimte rondloop, mag gevang word met die oog daarop om dit te skut, deur -

- (a) 'n lid van die Suid-Afrikaanse Polisie Diens;
- (b) 'n lid van die Suid-Afrikaanse Weermag;
- (c) 'n lid van die Provinsiale Padverkeersinspektoraat;
- (d) 'n gemagtigde munisipale beampte; of
- (e) die eienaar van enige grond waardeur of waarlangs sodanige pad loop of wat aan sodanige openbare ruimte grens.

(3) 'n Persoon wat 'n dier vang met die doel om dit te skut ingevolge sub-artikel (1) en (2), mag nie die dier langer as ses uur aanhou, sonder om dit van genoegsame voedsel en water te voorsien nie.

(4) Enige persoon wat 'n dier vang met die doel om dit te skut, moet voldoen aan die bepalings van die Kode van Goeie Praktyk insake die Hantering en Vervoer van Geskutte Diere, soos vervat in Bylae 1.

## 6. Diere wat te wild, onbeheerbaar, beseer of boosaardig is om te skut

Indien 'n veearts of beampte beoog in Artikel 5(2)(a) tot (e), tevrede is dat 'n dier wat oortree

op enige grond, of sonder toesig op enige openbare pad of oopruimte rondloop, te gevaarlik, wild, onbeheerbaar, beseer of boosaardig is om te skut, mag hy of sy toestemming gee dat dit op menslike wyse vankant gemaak of mee weggedoen word, nadat skriftelike kennisgewing met verstrekking van redes op die eienaar van die dier bestel is waar die besonderhede van sodanige eienaar bekend is.

### **7. Vrylating van diere voor afvoering na skut**

(1) Die eienaar van 'n dier wat ingevolge artikel 5(1) gevang is, mag verhoë rig tot die eienaar van grond, beoog in artikel 5(2) vir die vrylating van die dier, alvorens die dier na 'n skut afgevoer word.

(2) Die eienaar van grond soos in artikel 5(1) na verwys -

- (a) mag sodanige dier onmiddellik vrylaat; of
- (b) mag die vrylating van die dier weier en daarop by die hof aansoek doen vir magtiging om die dier te skut, of skadevergoeding eis wat hy of sy gely het, in welke geval 'n Hof 'n bevel mag maak, insluitende 'n kostebevel wat die Hof as billik en regverdig beskou.

(3) Die eienaar van 'n dier wat gevang is ingevolge artikel 5(e) mag aansoek doen vir vrylating van sodanige dier voordat dit na 'n skut afgevoer word, in welke geval die persoon wat die dier gevang het, die dier onmiddellik moet vrylaat.

### **8. Versorging van diere wat oortree**

'n Persoon mag nie 'n dier wat gevang is nadat dit op enige grond oortree het of 'n dier wat in die proses is van afvoering na 'n skut, laat werk of mishandel nie.

### **9. Skut waarheen diere afgevoer moet word**

'n Dier wat gevang is met die doel om dit te skut soos beoog in artikel 5, moet na die naaste toeganklike skut, langs die kortste mees praktiese roete en in die kortste tyd prakties moontlik, afgevoer word: Met dien verstande dat diere van verskillende spesies te alle tye afsonderlik gehou moet word.

### **10. Inligting wat aan skutmeester voorsien moet word**

'n Persoon wat diere na 'n skut stuur, moet die skutmeester skriftelik van die volgende inligting voorsien -

- (a) die getal en beskrywing van die diere;
- (b) die grond waarop die dier gevang is toe dit oortree het; en
- (c) die afstand in kilometer, langs die kortste mees praktiese roete, tussen die plek waar die dier gevang is en die skut.

### **11. Aanvaarding van diere wat geskut word**

Die skutmeester mag nie 'n dier wat na die skut gebring word vir daardie doel, weier nie.

### **12. Skutregister**

(1) Die skutmeester moet -

- (a) 'n register op datum hou wat die inligting in Bylae 2 beoog, bevat en wat te alle redelik tye vir publieke insae beskikbaar moet wees; en
- (b) die register onmiddellik voltooi sodra 'n dier in die skut opgeneem word.

(2) Indien die skutmeester -

- (a) nalaat of weier om aan die bepalings van sub-artikel 1 te voldoen;
- (b) wetend 'n vals inskrywing in die skutregister maak;
- (c) op bedrieglike wyse enige bestaande inskrywing in die register verwoes of uitvee; of
- (d) opsetlik 'n vals afskrif of uittreksel uit die register aan enige persoon verskaf, maak hy of sy hom of haar skuldig aan 'n misdryf.

### **13. Kennisgewing aan eienaars van diere**

Die eienaar van 'n dier beoog in artikel 5(1), 6, 14(2)(b), 15(1)(c), 17(b), 21(1)(b) en 23(a), moet in kennis gestel word deur -

- (a) 'n geskrewe kennisgewing op hom of haar te bestel;

- (b) 'n afskrif van die kennisgewing aan die eienaar op die Munisipale Kennisgewingbord te plaas; en
- (c) 'n afskrif van die kennisgewing op ten minste twee opeenvolgende dae in 'n koerant wat algemeen in die munisipale gebied in sirkulasie is te publiseer.

#### **14. Versorging van geskutte diere**

- (1) Die skutmeester -
- (a) is verantwoordelik vir die behoorlike versorging van alle geskutte diere;
  - (b) moet verseker dat water en voldoende voedsel te alle tye vir geskutte diere beskikbaar is; en
  - (c) is aanspreeklik aan die eienaars van geskutte diere vir enige skade aan diere berokken as gevolg van sy of haar opsetlike of nalatige optrede of versuim.
- (2) (a) Indien die skutmeester van mening is dat 'n geskutte dier gevaarlik, boosaardig, permanent gebreklik of dodelik siek is kan hy of sy in samewerking met 'n veearts of ander paslik gekwalifiseerde persoon die vernietiging of wegdoening van die geskutte dier magtig.
- (b) Die skutmeester moet, waar die besonderhede van die eienaar bekend is, onmiddellik die eienaar skriftelik van die hofbevel en die vernietiging of wegdoening van die dier in kennis stel.

#### **15. Afsondering van besmette diere**

- (1) Indien die skutmeester vermoed of bewus raak daarvan dat 'n geskutte dier of diere wat geskut staan te word, besmet is met enige siekte vermeld in die Wet op Dieresiektes, 1984 (Wet 35 van 1984), moet hy of sy-
- (a) afsonderlike verblyf vir sodanige dier voorsien;
  - (b) die dier onmiddellik afsonder en die siekte aan die naaste staatsveearts rapporteer; en
  - (c) waar die besonderhede van die eienaar beskikbaar is, onmiddellik die eienaar van die dier skriftelik in kennis stel.
- (2) Indien geen staatsveearts beskikbaar is nie, mag die skutmeester 'n verslag van 'n privaat veearts aanvra. Indien 'n privaat veearts nie beskikbaar is nie, mag hy of sy, hom of haar tot die hof wend, wat dan die vernietiging of wegdoening van die dier mag goedkeur.
- (3) Die skutmeester moet onmiddellik die eienaar van die dier skriftelik van die Hofbevel en vernietiging of wegdoening in kennis stel.

#### **16. Geskutte diere nie geskik vir werk**

Die skutmeester -

- (a) mag nie 'n geskutte dier vir werk of enige ander doeleinde gebruik of toelaat dat dit vir werk of enige ander doeleinde gebruik word nie; en
- (b) moet te alle tye toesien dat manlike diere afsonderlik van vroulike diere gehou word.

#### **17. Vrektes onder of besering van geskutte diere**

Indien 'n geskutte dier vrek of beseer word, moet die skutmeester -

- (a) die oorsaak van die vrekke of besering in die skutregister aanteken; en
- (b) waar die besonderhede van die eienaar beskikbaar is, die eienaar van die vrekke of besering van die dier in kennis stel.

#### **18. Afskrifte van verordeninge**

Die skutmeester moet sorg dra dat afskrifte van hierdie verordening by die skut ter insae lê.

#### **19. Gelde en koste betaalbaar**

Die skutmeester moet -

- (a) die gelde wat van tyd tot tyd deur die Munisipaliteit vasgestel word kragtens artikel 75A van die Plaaslike Regering, Munisipale Stelselwet, 2000 (Wet 32 van 2000) van die eienaar van 'n geskutte dier verhaal; en
- (b) die koste vir dip, mediese behandeling, inspuitings of ander behandeling wat

nodig geag word ingevolge hierdie verordening of enige ander wetgewing, van die eienaar van die dier verhaal.

## **20. Vrylating van geskutte diere**

- (1) Die skutmeester moet onmiddellik 'n geskutte dier vrylaat en aan die eienaar 'n kwitansie voorsien, indien die eienaar -
- (a) bewys van eienaarskap van sodanige dier lewer; en
  - (b) die gelde en kostes beoog in artikel 19, betaal.
- (2) Indien die eienaar van 'n geskutte dier nie die gelde en kostes in artikel 19 beoog, kan betaal nie, mag die skutmeester sodanige dier terughou totdat die gelde en kostes betaal is.

## **21. Verkoop van geskutte diere**

- (1) Die skutmeester moet -
- (a) wanneer ookal enige geskutte dier nie binne sewe dae gelos word nie, by die hof aansoek doen om sodanige dier te verkoop; en
  - (b) in die aansoek beoog in paragraaf (a), bewys lewer aan die Hof dat hy of sy 'n faktuur soos beoog in sub-artikel (2), aan die eienaar bestel het, indien die besonderhede van die einaar bekend was.
- (2) Die faktuur beoog in sub-artikel (1)(b), moet -
- (a) die gelde en kostes betaalbaar ingevolge hierdie verordening; en
  - (b) die bedrag van enige skade wat die eienaar van grond waarop die dier oortree het, gely het, aandui.
- (3) Die Hof moet, ongeag of die bedrae in die faktuur in artikel (1)(b) genoem, betwis word al dan nie -
- (a) summier die saak ondersoek;
  - (b) ondersoek instel of die skutmeester wel 'n kennisgewing op die eienaar van die dier bestel het; en
  - (c) 'n bevel maak wat as billik en regverdig beskou word, insluitend 'n bevel,
    - (i) rakende koste; en
    - (ii) rakende die proses wat deur die skutmeester gevolg moet word met die verkoop van die dier.

## **22. 'n Skutmeester mag nie geskutte diere koop nie**

Die skutmeester of 'n familielid, deelgenoot of enige medewerkers, mag nie persoonlik of deur enige persoon aan die koop van diere by 'n skutverkoop, deelneem nie.

## **23. Diere wat nie verkoop word nie**

In die geval dat enige dier nie verkoop soos beoog in artikel 21 nie -

- (a) moet die skutmeester onmiddellik die Hof en die eienaar, waar die besonderhede van die eienaar bekend is, van die geskatte waarde asook die koste en gelde betaalbaar, in kennis stel; en
- (b) mag die Hof enige bevel maak wat dit as billik en regverdig beskou.

## **24. Opbrengs**

Die volle opbrengs van die gelde en kostes beoog by artikel 19 moet in die munisipale inkomstefonds gestort word, met dien verstande dat ingeval 'n dier teen 'n hoër prys verkoop word as -

- (a) die gelde en kostes aangegaan; en
- (b) enige skadevergoeding toegeken ingevolge artikel 21(3)(e), moet sodanige oorskot binne 30 dae na die verkoping aan die eienaar betaal word, behalwe as die identiteit van die eienaar nie vasgestel kan word nie, in welke geval die oorskot in die inkomstefonds gestort moet word.

## **25. Optrede vir verhaling van skadevergoeding**

Niks in hierdie verordening verhoed die eienaar van grond of enige ander persoon om 'n regsaksie in te stel in enige hof teen die eienaar van 'n dier wat oortree nie, vir die verhaling van skade gely as gevolg van 'n dier wat oortree het.

## 26. Prosedure vir Hofaansoeke

'n Aansoek aan die Hof om -

- (a) 'n dier kragtens hierdie verordening te skut, moet voldoen aan die prosedure beoog in Reël 55 van die Reëls van die Hof; en
- (b) 'n dier kragtens hierdie verordening te verkoop, moet voldoen aan die prosedure beoog in artikel 66 van die Wet op Magistraatshowe, 1944(Wet 32 van 44) en Reël 41 van die Reëls van die Hof, gemaak deur die Reëlsraad vir Howe kragtens artikel 6 van die Wet op die Reëlsraad vir Howe, 1985 (Wet 107 van 1985), en afgekondig onder Goewermentskennisgewing Nr. R1108 in Regulasie Koerant no. 980 van 21 Junie 1968, soos van tyd tot tyd aangepas, saamgelees met die nodige wysigings.

## 27. Vrywaring

Die Munisipaliteit, skutmeester en enige beampte, werknemer of agent van die Munisipaliteit sal nie aanspreeklik wees vir die dood van of besering aan enige dier as gevolg van sy of haar aanhouding skut of vrylating of as gevolg van die skut proses nie.

## 28. Oortredings en boetes

'n Persoon wat -

- (a) 'n dier wat wettiglik gevang is met die doel om dit te skut of wat wettiglik geskut is, vrylaat;
- (b) onwettig 'n dier vang met die doel om dit te skut;
- (c) onwettig 'n dier skut; of
- (d) enige bepalings van hierdie verordening oortree, is skuldig aan 'n misdryf en mag by skuldigbevinding -
  - (i) 'n boete of tronkstraf of enige van sodanige boete of sodanige tronkstraf of beide sodanige boete en sodanige tronkstraf opgelê word; en
  - (ii) in geval van 'n voortdurende oortreding tot 'n bykomende boete of bykomende termyn tronkstraf of tot sodanige bykomende tronkstraf sonder die keuse van 'n boete, of tot beide sodanige boete en tronkstraf vir elke dag wat sodanige oortreding voortduur opgelê word; en
  - (iii) 'n verdere bedrag gelyk aan enige koste en uitgawe wat die hof bevind deur die munisipaliteit aangaan is as gevolg van sodanige oortreding of nalatigheid, opgelê word.

## 29. Bylae 1 en 2 vorm deel van hierdie verordening

Bylae 1 en 2 tot hierdie verordening vorm deel van hierdie verordening vir alle doeleindes.

## 30. Herroeping van bestaande verordeninge

Die bepalings van enige verordeninge wat voorheen deur die munisipaliteit afgekondig is of wat deur ontbinde munisipaliteite wat nou by hierdie munisipaliteit ingelyf is, afgekondig is, word hiermee herroep vir sover dit verband hou met sake wat onder hierdie verordening behandel is.

## 31. Kort titel en inwerkingtree

Hierdie verordening staan bekend as die Verordening insake die Skut van Diere en tree in werking op die datum waarop dit in die Provinsiale Koerant afgekondig word.

**BYLAE 1**  
**Kode van Goeie Praktyk insake die Hantering en Vervoer van Geskutte Diere**  
*(Artikel 5(4))*

**DEEL I: Kraalvereistes**

1. Verskillende spesies diere moet in afsonderlike krale gehou word.
2. Diere mag nie in oorvol krale opeengehoop word nie en die ruimte moet voldoende wees sodat alle diere gelyktydig kan lê en mag nie minder as 1,5 vierkante meter grondruimte per dier wees nie.
3. Opstandige diere mag nie saam met ander diere gehou word nie.
4. Jong gespeende of jeugdige diere mag nie saam met volwasse diere gehou word nie, met uitsondering van 'n ma en haar kleintjies.
5. Voorsiening moet in krale gemaak word vir -
  - (a) geriewe soos rakke, voerbakke of ander geskikte houers wat maklik skoonmaak, wat die voer van diere van die grond af moontlik maak en wat gediens kan word sonder om diere te steur;
  - (b) watertroë wat 'n voldoende, geskikte voorraad vars water te alle tye voorsien;
  - (c) voldoende geriewe vir die behoorlike skoonmaak van hokke; en
  - (d) geriewe vir die veilige hantering van diere.
6.
  - (a) Die kampe moet te alle tye in 'n goeie werkende toestand gehou word.
  - (b) Skerp punte, soos punte van drade, gebreekte planke, happerige punte, skarniere of boutte wat uitsteek, wat beserings aan diere kan veroorsaak, moet verwyder of na behore bedek word.
7. Die vloer van die hele kamp, insluitend 'n op-en-aflaai vragwal, toevoerbane en gange moet voorsien word met 'n oppervlakte wat voldoende glipvry is, sodat dit geskik sal wees vir die aanhou van diere.

**DEEL II: Hantering van diere**

8. Diere moet te alle tye menslike, met geduld en verdraagsaamheid behandel word.
9. Die volgende moet in gedagte gehou word tydens die hantering van diere -
  - (a) diere reageer beter wanneer hul aanjaer agter hulle staan, maar binne hul gesigsveld.
  - (b) tropdiere reageer beter wanneer hulle in 'n trop aangejaag word, in plaas van een een.
10. Diere mag nie aan hul bene gesleep, of aan hul koppe, ore of sterte gedra word nie.
11. Jong kalfies moet opgelig word by die bors en agterkwart en gedra word indien hulle nie self met gemak kan loop nie, in die alternatief moet hulle gerig word deur een hand op 'n agterkwart en die ander hand naby die skof of nek, deur saam te stap in die vereiste rigting teen 'n geskikte en gemaklike pas.
12. Slegs stokke met seildoek oorgetrek of dryfbande mag gebruik word tydens die aanjaag van diere en dit is verkieslik om op die grond agter die dier te slaan as op die dier self.
13. Elektriese aanporders, stokke of sambokke mag nie op jong kalwers gebruik word nie.
14. Elektriese aanporders mag nie oormatig of voor die voet gebruik word nie en mag ook

nie op die gesig of anale- of geslagsdele van diere gebruik word nie.

### DEEL III: Verskuiwing van diere

15. Diere wat aangejaag word moet te alle tye onder behoorlike en bekwame toesig wees. Diere wat aangejaag word moet op 'n kalm manier teen 'n pas wat ontspanne, gemaklik, natuurlik vir daardie dier is en nie vinniger as die pas van die stadigste dier daar, aangejaag word nie.
16. Diere mag nie vir langer as tien uur aaneen aangejaag word sonder 'n rustyd van minstens een uur nie, asook die voorsiening van genoegsame, geskikte vars water wat aan al die diere beskikbaar moet wees nie.
17. Geen dier mag vir afstande langer as die volgende aangejaag word nie -
  - (a) gedurende 'n reis wat nie langer as een dag duur nie -
    - (i) 20 km vir skape en bokke; en
    - (ii) 30 km vir beeste; en
  - (b) gedurende 'n reis wat meer as een dag duur -
    - (i) 20 km gedurende die eerste dag en 15 km vir elke daaropvolgende dag, vir skape en bokke; en
    - (ii) 25 km gedurende die eerste dag en 20 km vir elke daaropvolgende dag vir beeste;
18. Sodra diere hul oornag kamp bereik moet hulle onmiddellik voer en water kry, welke voer voldoende en geskik moet wees vir elke spesie.
19. Diere mag nie na donker aangejaag word nie.
20. Geen dier wat siek, beseer of vermink is, mag aangejaag word nie.

### DEEL IV: Voertuie gebruik tydens vervoer van diere

22. Voertuie en alle sleepwaens wat vir die vervoer van behoefde diere gebruik word, moet geskik wees vir sodanige diere en in 'n padwaardige toestand wees.
23. Alle voertuie en sleepwaens in item 22 genoem moet -
  - (a) 'n geskikte glijpvrye vloer hê wat nie die skoonmaak van die voertuie se vloer belemmer nie, hoewel heglatte of staal traliewerk toelaatbaar is;
  - (b) voldoende lug en lig deurlaat terwyl dit in beweging of stilstaande is, terwyl geen voertuig geheel en al toegemaak mag wees nie.
  - (c) voldoende beskerming van uitlaatgasse hê, aangesien blootstelling aan uitlaatgasse diere se asemhaling kan belemmer en angs veroorsaak;
  - (d) sywande hê wat hoog genoeg is om te voorkom dat diere ontsnap of uit die voertuig val:  
met dien verstande dat -
    - (i) die sywande en afskortings wanneer in gebruik op 'n voertuig om diere van mekaar te skei van 'n hoogte moet wees, nie laer as die skouer van die grootste dier wat vervoer word nie;
    - (ii) in die geval van beeste uitgesonderd kalwers, moet die minimum hoogte 1800 millimeter wees; en
    - (iii) in die geval van kleiner diere moet die minimum hoogte 750 millimeter wees.
  - (e) in die geval van 'n multiverdieping voertuig moet die hoogtes tussen dekke voldoende wees en in die geval van skape en varke nie minder as 1000 millimeter wees nie, ten einde die grootste diere in staat te stel om natuurlik vry en ten volle regop te staan en om voldoende ruimte toe te laat bokant die diere vir lug om vrylik te vloei.
  - (f) soliede ondeurdringbare vloere hê;

- (g) op en aflaai openinge aan die agterkant van die voertuig hê gelyk aan die volle wydte van die voertuig of indien aan die kante, 'n wydte hê van nie minder nie as 2400 millimeter.
- (h) hekke hê met of sonder afskortings -
  - (i) van 'n ontwerp en konstruksie, sterk genoeg en geskik vir die vervoer van die beoogde besending.
  - (ii) wat vrylik kan oop en toemaak en in staat is om goed beveilig te word.

24. Die digtheid van diere wat saam geplaas is in enige ruimte moet sodanig wees dat die veiligheid en gerief van die diere gedurende vervoer verseker word en die voorgestelde vloerruimte per dier sal -
- (a) 1,4 vierkante meter per groot dier; en
  - (b) 0,5 vierkante meter per klein dier wees.

#### **DEEL V: Voer en water gee van lewende hawe voor oplaai**

25. Diere moet voorsien word van voldoende en geskikte voeding en vars water totdat die reis 'n aanvang neem.

#### **DEEL VI: Op-en-aflaai prosedure**

26. Op-en-aflaai van diere op en vanaf voertuie moet so stil en kalm moontlik geskied met geduld en verdraagsaamheid sonder onnodige teistering, verskrikking, verkneusing, besering, lyding of spanning.
27. Geen dier mag aan sy kop, wol, vel, ore, stert, horings of bene op- of afgelaai word nie.
28. Geen dier mag op enige ander wyse as die volgende op- of afgelaai word nie -
- (a) by wyse van 'n laaibrug met 'n glipvry oppervlakte, sterk genoeg om die gewig van die spesie dier wat hanteer word te ondersteun, met voldoende sypaneel of traliewerk wat die ontsnapping of afval van diere van die loopplank sal voorkom en wat teen 'n helling van nie meer as 25 grade lê nie; of
  - (b) by wyse van 'n laaiwal wat gelyk is aan die vloer van die voertuig of, wanneer afgelaai word, nie meer as 310 mm onder die vloer van die aflaai voertuig nie en met 'n helling van nie meer as 25 grade nie.
29. Indien 'n voertuig toegerus is met sy eie verwyderbare laaibrug moet dit 'n glipvrye oppervlakte hê en van voldoende lengte wees om, wanneer dit laat sak is, die helling nie meer sal wees as die na verwys in item 28 nie, en met die afstand tussen die grond en die haak van die laaibrug nie meer as 120 mm nie.
30. 'n Laaibrug se hoogte moet elke keer aangepas word om presies met die voertuig se vloerhoogte ooreen te stem.
31. Die reis moet so gou moontlik begin nadat lewende hawe opgelaai is en moet onmiddellik afgelaai word, wanneer hulle hul bestemming bereik.
32. Tensy voldoende voorsiening gemaak is vir die effektiewe skeiding van verskillende spesies diere, mag dit nie in dieselfde voertuig gelaai en vervoer word nie.
33. Diere van verskillende ouderdom, grootte en geslag mag nie gelaai en vervoer word nie, tensy voldoende voorsiening gemaak is vir die effektiewe skeiding van sodanige diere.
34. Volwasse beeste met horings mag nie saam met poenskapbeeste vervoer word nie en hulle moet afsonderlik gehok word.
35. Indien daar voldoende rede bestaan om te glo dat 'n dier tydens 'n voorgenome reis geboorte mag skenk, mag sodanige dier nie gelaai word nie.

36. Ingeval 'n dier wel tydens 'n reis geboorte skenk moet die nodige voorsorg getref word om die ma en kroos te beskerm teen vertrapping of besering of teistering deur ander diere.
37. Ingeval die -
- (a) transport voertuig onklaar raak;
  - (b) transport voertuig in 'n ongeluk of botsing betrokke raak; of
  - (c) dier of diere in transito beseer raak of vrek, moet die karweier onmiddellik die besonderhede rapporteer aan , of hulp vra van -
    - (i) in die geval van paragraaf (a) 'n insleepdiens;
    - (ii) in die geval van paragraaf (b) die Suid-Afrikaanse Polisie Diens en die verkeersowerheid; of
    - (iii) in die geval van paragraaf (c), 'n veearts.

#### **DEEL VII: Beheer van diere tydens vervoer**

38. Indien die vervoer van enige dier 'n besering aan die dier self of ander diere kan veroorsaak, moet dit onder bedwang gehou word, op so 'n manier dat sodanige besering voorkom word.
39. Geen dier mag vir meer as vier uur in enige vier en twintig uur tydperk onder bedwang gehou word nie.
40. Geen draad of baaltou mag gebruik word om diere se bene of voete mee vas te bind nie.
41. Ten einde verwurging of nekbreke te voorkom mag geen dier met 'n skuifknoop aan hul horings of nek aan 'n voertuig vasgemaak word nie en die tou moet op die dier se kniehoogte aan die voertuig vasgemaak word sodat ingeval die dier sou val die moontlikheid dat die dier beseer raak verminder word, met die tou synde lank genoeg ten einde die dier toe te laat om gemaklik in 'n natuurlike posisie te lê, met sy kop regop.

**BYLAE 2****Skutregister Inligting**  
*(Artikel 12)*

'n Skutregister moet ten minste die volgende inligting bevat -

1. Naam van die skut
2. Datum waarop 'n dier ontvang is
3. Getal en beskrywing van diere
4. Merke of brandmerke op diere
5. Oorettiket nommer deur skutmeester toegeken
6. Naam en adres van persoon wat die dier gevang het
7. Naam en adres van persoon wat die dier aan die skut gelewer het
8. Naam en adres van die eienaar van grond waarop die dier gevang is
9. Naam en adres van die eienaar van die dier
10. Naam en adres of beskrywing van plek waar die dier gevind is
11. Afstand tussen die plek waar die dier gevang is en die skut
12. Besonderhede van skade deur die dier aangerig
13. Vervoerkoste betaalbaar
14. Besonderhede van uitsit of wegdoening van die dier
15. Oorsaak van dood of besering van geskutte dier
16. Beskrywing en bedrag van skutgelde
17. Skadevergoeding toegeken deur die Hof
18. Datum van aflossing van die dier
19. Datum van verkoop van die dier
20. Opbrengs vir die verkoop van die dier
21. Naam en adres van koper van 'n dier
22. Oorskot bedrag (indien enige) aan die eienaar of munisipaliteit betaal
23. Kwitansie nommer
24. Besonderhede van hofbevel rakende diere wat nie tydens veiling verkoop is nie